

皇明肅皇外史

鄭平知
PDG

皇明肅皇外史卷之三十三

涑川范守己輯

癸丑嘉靖三十有二年春正月戊寅朔日有食之
先是歲前秋月山東徐淮及廣東俱大水冬日下
有赤氣及四方地震疊見章奏至是元日日食不
盡者二秒南京御史徐棡上言曰者衆陽之長以
清明晉照為德元日者三陽之首以生育長養為
事乃于此時謫見于天數十年來未有天變若是
異者夫日食為占先儒謂為小人陵君子夷狄侵
中國之象以實應之則進君子退小人莫要于大
察乞勅部院東公去留以明黜陟之典而京堂大

臣依故事自列毋妨賢路綏中國制夷狄莫先于
自治乞勅邊臣撫士卒嚴團練固城堡謹烽堠以
為先事之防疏上不報久之謫忾補外任

逮繫御史趙錦于詔獄

錦時巡按在外見有日食之變亦上言春秋日食
三十有六未有無其應者至于食在正旦古人所
謂變見三朝其應尤重臣謹以天意驗之人事醜
虜驕橫閣臣怙寵有若影響之不易者敢昧死為
陛下陳之我太祖高皇帝始罷丞相散其權于
府部諸司而總之朝廷上不失其操柄下不嫌于
逼僭此聖祖之慮所以獨超前代也今之內閣

無丞相之名而有其實非高皇帝不設丞相本
意然當時諸臣猶未敢招權市寵賄賂公行今大
學士嚴嵩以奸佞之雄繼登台鼎怙恩寵以張其
威權假刑賞以行其愛憎事無巨細咸欲取裁于
一己少有違拂必陰中之故銓司之黜陟本兵之
用舍皆先關白而後具題清要之職優厚之地非
其私人賄客則不可得邊臣遇有功罪必先腹削
士卒以行賄賂入則頤指諸司曲為擬議體勘之
臣明知其冒濫而不敢上聞執法之司心灼其冤
抑而不敢申理至于宗藩勳戚之封襲文武大臣
之贈諡亦惟視賂之厚薄為遲速予奪而莫之他

顧諸司之章疏必先呈閱而後聞四方之奏請各具副封以自達其諸中外臣僚之陞除酬謝朝覲公委給由之饋遺奇珍異彩水運陸輸以為常而希寵干進之徒妄自貶損稱諄非類頌美功德比擬不倫奴顏婢膝于其前而廉恥掃地則臣所不忍言也昔者散丞相之權而分之于府部諸司今則合府部諸司之權而總之于內閣雖前代丞相之顓恣何以加諸惟陛下深思而徐察之至于醜虜驕橫固聖心之所軫慮者其于防禦諒已周詳而封疆之臣未見有堅甲利兵足以制醜虜之死命者何哉朱熹有言其本不在邊鄙而在朝廷

其具不在兵食而在紀綱。今閣臣行私，邊將用倖，以培尅為得計，以營求為材能。故朝廷之上用者不賢，賢者不任，賞不當功，罰不當罪。紀綱大壞，雖有百萬之眾，何益于事哉？臣願陛下觀上天垂象之顯察，二祖立法之微，念操柄之不可使移，思紀綱之不可使亂，將嵩罷免以應天變，慎簡忠良以備顧問，勿使復侵府部諸司之柄。則朝廷清明，紀綱自正，醜虜雖橫，臣知其不足平也。疏上。帝方以供奉青詞悅嵩，命遣官校逮繫錦衣錦衣獄。久之，削籍為民。

以聶豹為兵部尚書。

豹初知華亭縣，歷官按察副使，以事削籍家居數載。虜犯都城時，以大臣薦，與何棟俱起家治兵。禦虜，日見信向，遂躋本兵。

逮繫兵部員外郎楊繼盛，于詔獄，考訊論死。初，嵩見馬市無成功，仇鸞敗誅，念繼盛言驗，欲致令親己。故一月數遷其官，且欲沽用才名也。乃繼盛益不平。嵩始遷刑部，即欲移疾歸。既而調武選，遂日夜具疏。草疏成，以是月十八日齋沐上之。言臣前阻馬市，逆鸞嗾獄吏欲死臣，陛下特寬其誅。不二年間，復令官臣夙夜祇懼，思所以舍身報塞，而莫知所為。則未有急于請誅賊臣者。方今外

賊惟虜、內賊惟嵩、未有內賊不去而外賊可除者也。嵩之罪惡盈滿，沈鍊、徐學詩、王宗茂等論之已詳，第皆言其貪污之小耳。臣敢以嵩之顓政、叛君、十大罪為陛下陳之。太祖罷中書丞相，載諸祖訓，計至深遠。嵩為輔臣，儼然以丞相自居。此壞祖宗之成法，罪一。權者人君馭天下之具，不可一日下移。嵩以擬旨自任，遂竊威福，以市一己之威惠，而羣臣畏嵩甚于陛下，此竊君上之大權，罪二。善則稱君，過則歸己，人臣忠君之道也。今陛下有一善，嵩必令子播眾以為成之自我，又刊刻聖諭奏記，欲使天下後世謂陛下之善盡出于

彼而後已。此掩君上之治功。罪三。陛下命嵩擬旨。嵩命子世蕃約義男趙文華等會署之。屢更數手。機密漏泄。即沈鍊劾嵩之疏。世蕃猶與文華擬旨送入。餘可知矣。此縱姦子之僭竊。罪四。嵩欲其孫冒邊功。先以外姪歐陽必進督兩廣。姻家平江伯圭為總兵。鄉人御史黃如桂為巡按。明姦比周。妄奏長孫嚴效忠有奏捷功。冒授錦衣鎮撫。又冊報效忠獨斬瓊州寇七級。今次孫嚴鵠襲替併功。陞授錦衣千戶。乃以必進為工部尚書。圭管後府。如桂還太僕少卿。此備既作。飭尤成風。蔣應奎等令子冒功。杖死謫戍。皆嵩有以倡之也。此冒朝廷

之軍功罪五逆鸞總兵甘肅以貪虐論革世蕃乃
受鸞金三千授指兵部薦為大將及鸞冒哈舟兒
軍功世蕃父子亦藉以陞蔭後知陛下疑鸞始
相排謗以掩初跡此引背逆之姦臣罪六前虜犯
內地尚書丁汝夔問計于嵩嵩數以勿戰恐敗不
可掩及汝夔逮治求嵩居間嵩曰無恐也吾密疏
保若矣汝夔臨刑而後知為嵩所紿此誤國家之
軍機罪七黜陟者人君之大權非臣下所得私郎
中徐學詩以劾嵩奪官矣及大計京官嵩逼吏部
併黜其兄中舍應豐賴聖明察及留之給事中
厲汝進亦以劾嵩謫為典史矣及計外官復逼吏

部將汝進削籍則中外諸臣被其中傷者何可勝數此專黜陟之大柄罪八嵩既專擅則吏兵二部之權尤所專主文武之遷除唯以賄之多寡為低昂故將官多賂削乎士卒而行伍失所有司皆剋剝乎下民而百姓流離怨恨載道人人思亂俱欲啖嵩之肉此失天下之心罪九嵩諂諛以欺上貪污以率下一人貪戾天下成風以守法紀為固滯巧彌縫為勤敏厲廉介為矯激善奔走為練達卑污阿附牢不可破此壞天下之風俗罪十嵩有十大罪而陛下不知者以有五姦為之地耳結納陛下之左右侍從一言一動無不關白幾凡

聖意之愛憎舉措嵩皆預知而遂其逢迎之巧是
陛下之左右皆賊嵩之間諜其姦一也以趙文華
為通政使凡疏到必送副封與嵩先閱而後進稍
有干涉即為彌縫御史王宗茂劾嵩之疏文華停
留五日而後上故嵩得以輾轉撫拾之是陛下
之納言皆賊嵩之守犬其姦二也嵩畏緹騎之緝
聞令子世蕃結姻緹帥以遂其掩飾之計是陛下
下之爪牙皆賊嵩之爪葛其姦三也嵩又畏臺諫
之彈糾故于進士初選非出自門下者不得為中
書行人其推官知縣非通賄不得與徵取而選擇
之時復取熟輒圓融者以補臺諫之列已而登拜

則留飲差發則餞遺有所愛憎則授意論列而緘
默無建白者五六載則擢置華顯故諸臺諫寧負
陛下而不忍忤權臣是陛下之耳目皆賊嵩之
奴僕其姦四也嵩又懼部臣如徐學詩者猶得以
議吾之後乃令子世蕃羅其有材望者結納之廉
其有怨望者斥逐之連絡倚附合為一黨是陛下
下之臣工皆賊嵩之心腹其姦五也嵩之十罪賴
五姦以彌縫五姦一破十罪立見陛下聽臣之
言察嵩之姦或召問二王今其面陳嵩惡或詢
諸閤臣諭以勿畏嵩威重則置之憲典以正國法
輕則諭令致仕以全國體賊臣既去豪傑必出雖

繫俺答之頸。臣敢許其易耳。疏入。帝大怒。命繫錦衣獄。詰問何自引。二王繼盛曰。非二王誰不憚嵩者。且王家事。寧不慮為嵩敗耶。錦衣衛上其語。命杖一百。血肉全起。乃下刑部擬罪。尚書何鰲受嵩指論。繼盛詐傳親王令旨。律絞。郎中史某持不可。嵩聞之。謫史外任。侍郎王學益贊鰲具其獄。尋遷一級。

二月改王忬巡撫浙江及福興漳泉地方。

忬以巡視權輕不足督率吏士。請改。勅文及印記從之。乃改巡視為巡撫。

加都督陸炳少傅兼太子太傅。支伯爵俸。

兵部尚書聶豹上言都督炳潛奪逆鸞之氣計安社稷功在國家與尋常勞勩不同宜侍以殊典以酬偉功帝從之乃加少傅支伯爵俸眷遇益隆

逮繫兵部郎中周冕于詔獄

初楊繼盛劾嵩父子言及歐陽必進竄效忠名冒功濫擢事必進上疏強辨自云欲白心迹下兵部查覈奏聞世蕃自為題草遣人遺武選司郎中周冕欲冕依草奏覆冕乃上言嚴嵩心事兩京臺諫諸臣言之已盡臣不敢再瀆聖聽臣職司武職功次聞見頗真謹即冒濫軍功一事為陛下陳

之按二十七年十月據通政司狀送嚴效忠年十
有六考會武舉不第志欲報效本部咨送兩廣聽
用次年據兩廣總兵平江伯陳圭都御史歐陽必
進題稱瓊州黎寇平遣效忠奏捷即援故事授錦
衣衛所鎮撫亡何嚴鵠告言效忠病發鵠以親弟
應襲又言效忠前斬賊首七級例宜加陞二級遂
授千戶臣于昔日問效忠為誰曰嵩之廝役也鵠
為誰曰世蕃之子也憤懣不平久之意嵩之表率
百僚顯為家謀敢同市井之行壞朝廷之法一
至于此今蒙明旨下本部查覈世蕃猶私創覆
草架搆虛詞遣臣欲臣依草題覆欺罔之罪可容

誅哉。天地鬼神照臨在上，其草見存，可為左據。臣竊思祖宗之法，萬世不易，未見宰輔子孫送軍門報效者。有之，自嵩始。蔣應奎、唐國相以卿二效尤，俱蒙追論，而嵩乃不究復，誰禁乎？伏望聖明察臣犬馬之心，特賜究正，使內外臣工知有不犯之法。臣雖隕首，亦無恨矣。疏入，帝以冕為挾私，命逮治之。

三月，王忬督兵破倭寇于普陀諸山。

初，王忬廉知參將俞大猷、湯克寬材勇，虛己任之。有都指揮盧鏜坐前都御史朱紘事，尹鳳坐贓累，俱繫獄。忬諳知其能，奏釋之，以為別將募沿海壯